

Táítása Ebeq sáhnsahwe ahtebé ehwehne.

Táításawe íre Asiu anínéna Porane ehweh kawerue sehgienna Kíriti marákórápéqté ké, Sísa tagaríah ké séhréh aritena kawerue wahnahnúwe. Poraga karábúsiipéq míotaq mah pahsí sehiranúwe. Wega Táításansabé Sísa tagaríah kéráq wahnahno ke omaq site sansánsábé, síwáhnoré sansánsábé, kawetaq mé sansánsábé ue mah ewhéhmári sehiranue Táítása teawuwe.

Poraga Táítása awu pahsíe.

1 Táításao, íné Porane páhsí sáhnsahwe tagáhno. Íné Manikáne arambehriu aní múge. Sísa Karáhéga we éhweh kosíwáhnorúno aintena eqmaq núwátáire. Manikánka omaq sito ke séhréh aritankeheéna eqmaq núwátáire. Segá aiq pútaq sansá Manikáne kaweq sansá ahtebagehboq kosíwáhnorúno éna eqmaq núwátáire.

2 Itega Sísansabé aiq pútare ateq oga mérapeq kiwíanehe iwíáhúne. Naho Maniká, íre péhenorahi anínká mahraréna, Ínéga omaq sitáhna kegá oga mérapeq awaq miagéhe úwe.

3 Oga mérapeq awaq miagéhe éna wewega iwíáhi tanáhráq mah kawéq éhwéh itene irupipeq iwíáh aitáráire. Maniká, ite kaweraitéh áninká ínénabe, Mah kawéq éhwéh koreri terinúno aintaráirana teri terinuge.

4 Táításao, néne páhsí sáhnsahwe tagáhno. Itega morá íwíahue Sísansabé aiq pútare atoyansabé are nénahni úkurone. Maniká Iteriboreq Sísa Karáhé, ite kaweraitárái anínseqka are séhréh atera arene aru ukiq atéhye.

Sísa tagariáh kéráq wahnahno ke omaq siteyabe éhwéhne.

5 Ite íre parabaruoya arámbéhri arega mirainkeheéna Kíriti marákóráq áuwátáuge. Mó kehiná suwahpeq mó kehiná suwahperue Sísa tagariáh kéráq wahnah anímári míagehboq omaq sito. Teawátáunserahnue omaq sito.

6 Peh kaweqtaq mía míai anímé peh morá áhré matiéh ánímé Sísa tagariáh kéráq wahnah aní míahrahire. Peh morá Sísansabé aiq pútare atáh ánímáríné sibowáwé wahnah aní míahrahire. Wene animárinká ahbabáréra sibowáné ehweh anterúáh ánímáríné sibowáwé wahnah ani íre míahrahire.

7 Sísa tagariáh kéráq wahnah arítéh áninká Manikáne arambehri auráq matiéh púana peh kaweqtaq mía míai anínká wahnah aní míahrahire. Píribahri anímé, áyáteh anímé, píah néna múgu wahgu aruqaruri anímé, tobeh aruqaruri anímé, móneyabé arutaboiri anímé íre wahnahnorahire. Írakaumo.

8 Nahnso ke kawerue kirabo arítéh ánímé, kaweqtaq méyabe arutaboiri anímé, tabasíwe míéh ánímé, kaweq iwíahue arambehri anímé, Maniká awahbeh sansá sehgí ánímé, wewene kaweq iwíah ambubu atiéh ánímé Sísa tagariáh kéráq wahnahnorahire.

9 Áwáhnoro ehwéh kawerue ambubu atiéh áninká mó ke kawerue síwáhnororahire. Wega aiq pútaq ehwéhnsábé suwahrieh ke síwáhnoréna sene iwíáh kaweraritankéhe.

Péhe éhwéh síwáhnoro keyábé éhwéhne.

10 Kíriti marákórápéqté ké auráq matiáhro. Píribahri ke méra sega abehq éhwéhnéra péhe éhwéhnuwe. Asiu kené síú amurúrue sansa sehgióro e kewé áhnte mina tahnsa míáhwe.

11 Segá mó kené móne meyaneheéra áhnte mi karíronánínsábé péhe éhwéh síwáhnorowe. Mi karíronání aiq pútaq sansá súéhboq péhe kéné ehwehnsabé ehiya míáhro arito.

12 Kíriti marákóípéqté ání Kíriti ke seyene ehweh irari anínká mahraréna, Kíriti marákórápéqté kegá péhe éhwéh irare irareo ke wóe. Se áwéh keropia póéráhq tahnsa ké méra taorahoue kobukahburo ke wóe ire.

13 Wega irari ehwéh aiq pútaq ehwéhne. Minayabe Kíriti keyábé págegeue síwáhnorúno.

14 Aiq pútaq ehwéhnsábé suwahrieh kegá sehgióro e ehwéhnikákáq Asiu kené péhe áwáhe ehwéhnikákáq suera Sísane sánsá kawerue sehigéhboq págegeue síwáhnorúno.

15 Kaweqtaq mía míao kegá moke táchutahuq íre órirane éra peh nah naneq mire éra nahwe. Sísansabé íre aiq pútare atáh áhbárérá kewé moke mah marákóípéq keh náneq tagéra íre kaweq nanere iwíáhowe. Sene sirupipeq ahbabáq áhwáréra kaweq sansá íre írátiáh púara sega kaweq iwíáh íre orahowe.

16 Segá mahraréra, Itega Maniká tagarione irarewe. Iraréra Manikáne ehweh anteruera

ahbabáréra kaweq arámbéhrí íre miraorahowe. Minayabe ite tagarionawe se Maniká íre tagariáhwe.

2

Aboawah wehyábé síwáhnoré ehwehne.

¹ Arerega peh tábúsoqme aiq pútaq ehwéh síwáhnorúno.

² Aboawah wehyábé mahraré, Múgu wahgu iye-hboq áhnte piáh né pehragahro. Peh tábúsoqme iwíáhoro. Tabasíwe mía míaoro. Aiq pútaq sansá ahrebawé sehgióro. Manikánsabe irutaboiréq we-hukeyabé irutaboiroro. Sísane sánsá kawerue sehgióro terio.

Aboawah ahréyábé síwáhnoré ehwehne.

³ Aboawah ahrérónsábé mahraré, Manikánsabe áhitenéq kaweqtaq mía míaoro. Mó keyábé péhe ehwéh aritého. Píahyabé irutaboiriyeho. Peh kaweq sansá síwáhnororo terio.

⁴ Segá ibehinínsónsábé mahraue síwáhnororo arito. Iteruwehqsonseq itene animárnseqsabé kawerue irutaboiroro teríero terio.

⁵ Iteitene kaweq iwíáh ambubu atawéq sehgióro teríero terio. Mó weh pehragéq peh morá are-nawehq kéro teríero terio. Íre itereq morábi náneq pehragéq peh iteitene arambehriue areq-nahreq ahréró míáhro teríero terio. Peh kaweqtaq mía míaéq iteruwehqsonseq ehweh kawerue íráhro teríero terio. Segá mah ehwéh sehgírataq mó kegá Manikáne ehwehnsabé íre awiréh atahráhwe.

Mahbigaunsábé síwáhnoré ehwehne.

6 Mahbigaunsábé iteitene kaweq iwíáh ambubu atawéq sehgóro terio.

7 Segá are tagéra ahtebagehboq arega peh kaweq sansánúno. Síwáhnoróna tanáhráq ogiogi pehragé peh kawerue tábúsoqme síwáhnorúno.

8 Mirainaraq are áwíoqnah kegá tagéra siyehitáhnayabé íre ehwehia peh túbáh agigehe.

Mó kené arambehri keyábé síwáhnoré ehwehne.

9 Mó kené arambehri arítáh kékábé mahraré, Píribahri sansá sueq ite arambehriraq ítéh áníné ehweh kawerue ireq itene arambehri tábúsoqme miraoro terio.

10 Sene ménsámehnsá aebóiyeho. Peh kawerue auráq sítáriáhro terio. Mirairara tagehra kegá Maniká ite kaweraitéh áníné sánsá aiq kaweq sansáne iwíáhigehe.

Sísa tuina tanáhráqsábé éhwéhne.

11 Manikánka mah kehiná kékínánsábé arutaboiréna aiq sokigi aintéhre. Arutaboiréna ómi kaweraritahráhire.

12 Itensabé arutaboiréna mahraréna, Ínénabe íre aiq pútare aintáh kéká onserahniyeho. Mah marákóipéqté sánsánsábé irutaboiriyeho. Mah tanáhráq peh kaweq iwíáhue tabasiwe méq ínéga unserah kaweqtaq mía míaoro ire.

13 Sísa Karahé itene Maniká míre. We ite meirena kaweraitéh ání míre. Mókake we téhreh naneqkakáq tuina tanáhráqsábé iwíáh íwíáhéq kaweqtaq mía míaeq áwénunúne.

14 Webataq wene kaweq anímári mía míaegeheéna Sísaga itene ahbabáqsabe wene korahqtaté paiqmaranieéna putiowe. Minayabe

itene ahbabáq sansa moke sueq peh kaweq arámbéhríyábé irutaboironehe.

¹⁵ Teawewó éhwéh síwáhnorúno. Peh kaweq sansá sehgíoro arito. Ahbabáq sansa miraiyeho arito. Segá arene ehwehnsabé anetaníbo iwíáhiyehboq págegeue síwáhnorúno.

3

*Manikánka kaweraitáráinsabé kaweq
sansánonehe i ehwéhne.*

¹ Arega síwáhnorina keyábé mahraré, Kámáhni kerek sene wahnah kerekne ehweh kawerue íráhro arito. Mi kegá kaweq arámbéhrí miraoro irataq apubúue miraoro arito.

² Síehruruiyeho terio. Ehweh aruqaruriyehboq pehwehribeq méq uwaresa ánímári méq kawerarítáhro terio.

³ Naho iteitega saiyoéq ehweh anterueq péhe éhwéhnsábé aiq pútare atáráúnana ahbabáqsabe iuwahbaraire. Ahbabáqsabe iuwahbarainsabé ahkaragáraga ite saiqnariaraira. Saiqnariaraira q ahriahri ahbabáq aruqaruréq mó kené ménsámehsánsabe igará pabekuraire. Mó kegá itensabé iuwahriehre ewaq itega moq wensabé wensabé iuwahriehre iwíáhuraune.

⁴ Maniká, ite kaweraitéh áninká itensabé arutaboiréna kaweq sansá aitená arutaboiré sansa sokigi aiíre.

⁵ Sokigi aiená kawetaq míáhwe aitáráire. Íre iteitene kaweq arámbéhríyábé kaweraitáráire. Peh wewega arutaboiraitena itene ahbabáq sabi íúátáire. Sabi iuena itene irupipeq pabeq paberaitáráire. Pabeq paberaitárái puana

Manikáne Awanka o awá maqmarena organúq ítáráire.

⁶ Wenawanka organúq ítáráirana iteba mía míainkehééna Manikánka Wenawa eqmaq áuwátáire. Sísa Karahéga ite kaweraitaráinsabé eqmaq áuwátáire.

⁷ Sísa Karahéga itensabé arutaboiréna kaweraitaráinsabé Manikánka ite organúq ítáráire. Organúq ítáráiraq oga mía míaéq oga méräpeq awaq meyabe áwénunúne.

⁸ Teawú éhwéhnsábé aiq pútare atone.

Manikánsabe aiq pútare atáh kégá, Tábúsoqme kaweq arámbéhrí miraonehe iwíáhigehboq mótaq mótarue mah ehwéh págegeue síwáhnorúno. Wehukega kawerue ahtebagehboq mah ehwéh síwáhnorúno. Mah ehwéh aiq pútaq ehwéhnéna ómi ke séhréh aritahráhire.

⁹ Táhmaro kegá abehq éhwéhnéra sigaqnaréh síwíq pankerera tobehewe. Mi kegá Mósísiga sehgíóro ú ehwehnsábé moq tobehewe. Síwáhnorinaraq mi tobého ehwéh pehragáhno. Minawarimé íre iahtebahrahi naneq mire. Pebragáhno.

¹⁰ Sísa tagariáh kégá ehwehiyehboq abehq éhwéh aruqaruri aníné iwíáh tábúsoq ato. Mó tanáhráq mó tanáhrárue teawinana íre irahnaraq auwe móbeq míahno.

¹¹ Wene arupipeq ahbabáq áhwáreh puana wega íre kaweq iwíáhorahire. Wewene ahbabáqka kamah awinkéhe.

Páhsí parabaginai ehwéhne.

12 Wehukeníté sensíwíq Átémásareq Tíkíkúsireq míéhye. Mótaq mi aníté areba eqmaraníe. Areba sirataq arega mitaq sue Níkópórísi suwahpeq ínéba peheráh súno. Moke sóiriri tanáhráq Níkópórísi suwahpeq kowíanie iwíáhuge.

13 Sehgíóro ú ehweh ahtebeh aní wenáwíq Sénási wereq wene iyahnabo aní Ápóroreq itega mi aníté séhréh arito. Sega mó ke apubúue korerigéhboq se íre kék náneqmarí nario.

14 Itega wahnahno kegá séhrého sansá ahrebagehboq kaweq arámbéhrí miraoro terio. Túbáh agiyehboq Sísane arambehrio ke nárieq séhréh arítáhro terio.

15 Moke ínéreq míáh kégá itensabé iroro ewe. Mibeqté Sísá tagaríah ké, itensabé sirutaboiro keyábé iroro terio. Manikánka ite ómi séhréh aítéhre.

**Manikáne O Ehwehne
God's New Talk: The New Testament in the Awa
Language of Papua New Guinea
Nupela Testamen long tokples Awa long Niugini**

copyright © 1974, 1997 Wycliffe Bible Translators, Inc.

® Faith Comes by Hearing

Language: Awa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

PDF generated using Haiola and XeLaTeX on 28 Dec 2024 from source files dated 31 Aug 2023

9673cf68-887a-574e-9ac8-846469c86b12